

尺岡草堂遺集

尺岡草堂遺文卷三目錄

喜亭杜君墓表

先考靈表

先母靈表

鄒徵君墓誌

候選同知衛府君墓誌銘

光祿寺典簿銜敎諭李君墓誌銘

卽補直隸州知州陳君墓誌銘

吏部員外郎李君墓誌銘

庾園何君墓誌銘

梁茝湘戴姬壙誌

朝議大夫知府銜署荊門州知州潘君墓誌銘

鶴山縣訓導招月航先生墓碣

代

祭黃義婦文

祭伊善卿文

戴枚生詠

鄒徵君南海地圖贊

龐弼唐霍勉齋兩先生像贊

霍文敏王文成論學圖像贊

題鍾香巖小像

陶靖節像贊

虛谷黃先生像贊

老婦頌

尺岡草堂遺文卷三目錄終

尺岡草堂遺文卷之三

番禺陳璞著

喜亭杜君墓表

君諱濟霖字邦平又字喜亭南海人曾祖某祖某父蘭芳例贈文林郎早卒母楊太孺人撫以成立君性伉達而篤內行自其幼時已悉母勞苦恆發奮讀至咯血不肯休既長課徒以養母修脯所入無絲毫敢私外祖母貧老常依君歿復爲之喪葬有寡姊時時瞻之甥女善病供其醫藥友愛兩弟怡怡然又恆以不及事厥考爲痛憾顧嗜酒與番禺應冕卿交最深兩人遇輒酣醉竟

日繼而獲交李銓部恢垣陳孝廉朗山飲益豪善屬文
援筆立就年十八補弟子員越五年舉於鄉兩試禮部
不得志聞楊太孺人訃狼狽歸經營窀穸未一載以勞
疾竟卒年二十有七嗚呼痛哉君爲人和易坦直與物
無忤狀貌偉碩識者無不以遠到期之旣葬冕卿過謂
璞曰以喜亭而不永年爲之友者忍無一字述之耶以
文見屬璞不獲辭按君行事以表諸阡君配洪孺人女
二子一俱幼弟澤霖洪霖葬君於白雲山麓銘曰
纍然孤墳佳士瘞此誰其傷之有友應子冀我之文著
君之美文之不傳則亦已矣

先考靈表

東晉有陳將軍元德其裔繇於番禺至宋曰評者居縣南石子頭六傳曰震孫居赤岡自評至先考二十一世矣先考諱文瀾字壯業號春舟以字行高祖曰麗儒邑學生員曾祖曰方悅祖曰兆書父曰慶階業醫有名先考六歲失恃庶母徐鞠之十二歲而孤子母煢煢遺產爲從兄攘攷長無所藉挈家買於郡城生平敬禮士人族有赴城試者輒延至肆中爲之居停一言一動藉取益焉族中以祭田致訟怨家誣族人閏賜首謀求之不得以嘗應試主吾家疑先考匿之追呼到官橫加撈掠

拘係經年事白而家益蕩然時璞生八歲貧甚至斷炊
猶勉令就外傳璞稍長有勸使改業者輒忤然曰予少
不學至今爲恨何可令兒輩復爾因顧璞曰汝卽作溝
中瘠勿廢讀也及璞充郡生員暨舉鄉試先考若有喜
色旣而曰我初意第願汝知讀書不必汝得科目汝毋
謂旣得科目遂已償我志也先考爲人和平敦篤守古
誼薄時好事庶母唯謹庶母老病抱持搔抑進藥滌穢
一躬親之璞赴銓爲縣令屬曰汝得作官實先代潛德
所致惟勿緣素貧便至貪墨斯爲顯揚耳璞抵任以書
迎養報曰野人樂鄉園不便官廨汝勵清勤如待我側

以咸豐九年十月初五日卒年六十有八嗚呼言猶在
耳倏爾見背痛哉先考少當孤露中罹冤橫半生僕僕
饘粥餬口以教育不肖逮夫莫齒璞復遠宦至不獲視
含痛哉痛哉配曾太孺人先二十九年卒妾蘇子三璞
辛亥 恩科舉人江西安福縣知縣次琨殤次明玉女
一適潘玉良咸豐十一年三月葬官橋獅岡其孤子璞
泣血爲之表曰

術惟賈行則儒更憂患志不渝恩勤子不以爲愚保此
封樹裕厥後

先母靈表

先母之歿也璞年甫十三奉先君命自會垣扶柩歸葬於村北沙井氣祖塋之右迄今三十年矣璞歸展墓追思慈德流涕而書之於石母諱見英同邑小龍鄉曾維新女也端重寡言笑知書識大義來歸於陳事庶姑無悟色無倦容慈愛惠下婢媼罕逢其怒而約束子女甚嚴璞少時每夜自塾歸篝燈讀母治女紅於旁督之讀少輟卽加訓責或未能上口母重爲口授至三鼓令背誦一過乃許就寢女亦其一燈治針黹嚴督如之璞出戶偶未白必詰以何往罰使跣童兒嬉戲一概禁絕之

母體素弱產璞時幾殆後又以先君被誣係官晝夜憂煎遂得怔忡暨癥瘕疾及篤指璞屬先君曰能不以貧故使此子竟讀以副君志死無恨遂卒年四十一道光十二年也嗚呼痛哉璞穉齡失恃母生平懿行憶不能詳又遲至今日僅卽其大略表之璞之罪大矣母子女各一庶子琨明玉咸豐十年以子璞任江西安福縣知縣恭遇 覃恩敕贈正七品孺人表曰

爲慈母爲嚴師鞠育教誨身兼之祿不逮養千古哀此焉墓如之何勿思

鄒徵君墓誌

君諱伯奇特夫字其姓鄒居南海地曾祖憲平祖德高
父曰善文母招氏妻李先卒繼者梁子一達泉女子二
君少嗜書屏俗學一一實事以求是悟必入微不逞凡
解或創獲非立異聲音文字窮其源算術專門學尤邃
著書有古所未及適用在世無是器充邑生員不應舉
徵書下亦踰垣避同治八年歲在己五月七日遽告逝
得年甫五十有一知與不知皆隕涕葬橫岡頭祔祖塋
幽宮冥冥永以閔撰詞書石乃友事番禺陳璞用作誌

候選同知衛府君墓誌銘

君諱明彬字有儀先世自宋由南雄來廣州居番禺之
滙滘村遂爲番禺人曾祖超慤貤贈奉政大夫武功將
軍祖顯苾父文光俱贈朝議大夫武顯將軍君其第六
子也七歲而孤家窶甚母陳太夫人茹荼飲藥女紅爲
食以撫君之兄若弟君稍長念母勞苦不得休遂與兄
牽車服賈持樊重之術以抒母困而令季弟從戎圖顯
揚不數年家大起弟亦官參將矣於是伯兄援例捐知
府君亦捐同知以爲親榮不從仕也循彼南陔容容愉
愉兄先弟後凡可以娛母者力所能致無不致焉母年

既高邁疾日侍湯藥不離側夜卧不貼席母之歿也君
哀號依戀鬱鬱成疾期年不能釋遂以不起此君之孝
行犖犖大者古稱終身之慕何以加茲君恭兄愛弟既
翕且湛交朋會友敬而無失儉於自奉而豐於濟人饋
貧拯乏咸感其惠事賢友仁斯焉是取雖處闕闕郁平
有文何圖位不福德壽不隨仁以光緒二年閏五月二
十三日告終距生於道光九年十一月二十五日春秋
四十又八傷哉配室李宜人先君卒子榮堃郡生員榮
璽邑生員榮階榮邦皆嫡出榮翰榮耀庶室傅氏出孫
永韶永棉永恒以是年七月初二日葬君東門外大紗

帽岡之原君子榮潛璞堦也狀來乞銘弗獲辭乃爲銘
曰

曾閔之行業不必儒純瓘之德不藉詩書初求甘旨匪
操奇贏貨殖而封實天所亨至性旣肫養終志遂隨親
黃壤安若酣睡英英白雲護此幽宅未假以年將永厥
澤

光祿寺典簿銜教諭李君墓誌銘

龍門距會城數百里士罕有聞於時而粵中賢士大夫則無不知有李君鐵甫者余與君交稍晚而夙耳其行事未幾君卒將葬君之子來乞銘不獲辭按狀君諱柱蘭字誦芬鐵甫其號也先世當宋南渡時由中州入粵居龍門遂爲龍門人曾祖秩則國學生馳贈徵仕郎祖晃中歲貢生贈徵仕郎馳贈武畧佐騎尉父步墀按察司照磨贈奉直大夫君生有異稟四歲能背誦千字文九歲解作詩十七歲補郡生員顧屢躋棘闈年逾四十乃以廩貢生就教職厯署南雄學正永安海陽教諭豐

順信宜訓導先後秉鐸垂二十年崇名節飭士習植人
才所至人士無不愛且敬之然此師儒官職所當盡其
非茸闇昏憤猶或有能者咸豐十年君在南雄江南長
髮賊石達開率其黨數萬竄至自正月六月七月八月
及十一月賊去而復來者皆逼州城君陳規畫出勸民
捐資助軍復親荷戈以巡八月十一月之役賊至尤盛
城中洶懼居者頗爲出避計君言於知州請力守知州
壯之以北門委君北門賊最悍君手劍登陴激厲士民
目不交睫者八晝夜聲勢大振賊見守嚴不敢攻睨而
遁官軍邀擊敗之始遠竄不復至撫軍駐韶州聞之欲

叙君功君力辭嗟夫師儒官能辦此不一觀也君知幹
濟有才氣咸豐二年從化盜楊六數百人掠縣龍華墟
君時在外聞而遄歸途中以書招各鄉勇往禦賊聞竄
走四年紅巾賊蠡起龍門陷知縣典史俱死君以事在
會城隨新縣令還擊賊官倚之募勇一鼓復縣城時君
尙諸生以搢紳從事膽畧已如此論者惜君未大受不
盡其用諒哉君於學無不窺經史外泛及稗乘金石文
字尤留心 國家掌故鄉邦文獻海內輿圖與儕輩縱
談言之娓娓與修龍門縣志著有五經四書音釋正字
辨譌三餘叢綴思齊草堂詩集文集等書君生嘉慶十

五年三月二十八日終同治十年二月初四日春秋六十有二配廖宜人子五析歲貢生候選訓導焜附貢生熾廩生出嗣君從弟植蘭煥舉人大挑二等挺國學生女二長適邑武生廖國琬次適廖逢辰孫八均咸均韶均承均馥均武均英均夏均章曾孫一銘宏以同治十一年八月二十八日葬君於刁梅坑之原於德宜銘銘

曰

豐於文嗇於試折衝之才屈於博士將隆以名斯以位安此閼藏昌爾後嗣

吏部員外郎李君墓志銘

吏部員外郎李君恢垣旣卒其子青藻以狀來乞志其墓君與璞少同筆硯長共事數十年中雖不無離合而聲息常相聞今青藻不乞志於當世鉅公而索之於璞固以璞爲相知之素也璞何敢辭按狀君諱光廷字著道一字恢垣番禺人祖衍西父治高俱以君貴加級贈封中憲大夫君少慧讀書數行下年二十二充邑生員己酉拔貢辛亥恩科中舉人壬子成進士籤分吏部以主事用年已四十一矣癸丑假歸長髮賊方據金陵而粵中羣盜因之四起君居鄉集紳富出資財爲團練

保衛里鄙計時賊未張眾不爲意迄無應者君策不行
賊遂大熾據新造神頭爲巢穴以千金購君君乘夜走
會城城北賊攻城方急官軍不暇顧鄉落鄉紳士在城
中者設局謀募勇剿新造各巢得君至皆大喜以君夙
負幹濟也君慮岡尾爲新造後路賊敗必退據岡尾則
桑梓大受蹂躪乃請自爲一隊乘賊敗直入岡尾以犄
之賊果四潰不復能聚君遂駐岡尾捕餘孽撫良懦眾
復推主沙菱總局事鄉里藉以安事平大吏奏獎叙
補員外郎戊午入都供職庚申天津之役萬乘
出幸灤河人情洶懼曹吏散避君獨留不去入部視事

如故尚書全公深倚之大學士周公尚書萬公皆甚重君辛酉事大定君念中憲公已年踰七十家無次丁乃呈請歸養全公止之曰昔人皆去而汝獨留今人皆來而汝獨去何耶且來年京察汝當一等矣諸長官亦共挽之君思親益切越日再謁全公手版直書前某官全公大驚曰汝真去耶汝本寒素何以爲活君曰自來舌耕餬口今歸理故業足供淑水無慮也全公歎之乃聽歸歸則主講禺山又爲學海堂學長數年大吏延掌端溪書院修廣州府志終養服闋竟不復出君有至性少喪母暮年念及無不涕者其弟死時君在省寓方與客

談聞報慟哭立起奔喪呼舟歸故人子有貧不能讀者
爲具修脯使從師親友有急力爲經營至謁蹶以濟與
人交無城府而能面折人過其人去後則又爲之掩覆
焉平生磊落自喜好客善飲於學無所不窺善言地理
南北往返所至必詢其山川險要疆域道里手錄而詳
覈之攻古文精考證能詩而於駢文尤工歸里後專事
撰述有漢西域圖考七卷廣元遺山年譜二卷北程考
實二卷宛湄文鈔十卷詩鈔二卷光緒庚辰六月某日
以疾卒於端溪書院距生於嘉慶壬申某月某日春秋
六十有九配陳恭人妾許宜人先君卒子一長邁庸邑

生員陳恭人出次邁平福建候補通判許宜人出孫二
長延祐邁庸出次延祚邁平出女四長適鄔次適黃次
殤次適黎以某年某月某日葬君於某某之原銘曰
處亂應變用其智食焉不避用其義親老當歸官可棄
等身著述又餘事銘之幽宮千百禩郭有道碑此無媿

卽補直隸州知州陳君墓誌銘

君諱良玉字朗山一字鐵禪廣州駐防漢軍曾祖紀猷
祖時雄俱贈武翼都尉父寶贈奉政大夫君少嗜學無
所不窺尤熟史部於古今成敗得失瞭若指掌其遺文
逸事亦記誦不遺善詩工倚聲道光丁酉舉於鄉名益
起顧家素貧爲養親計或負米百里外新甯令李公延
福耳君名迎之課子相得甚歡縣有富人訟不得直知
令重君託人以千金求與令言君張目斥之去署中人
咸目君爲迂夫子令知之愈重君咸豐九年金陵賊竄
陷南安分擾惠州之河源龍川廣西按察使東筦張敬

修適在籍制府檄往防剿素稔君特延襄戎幕事平得請以知縣用而君已選通州學正乃就敎職通州學向兼理海運每次循例得保舉君初得加同知銜再以知縣升用後儘先補直隸州知州旋丁母憂歸服闋將赴部瀕行足疾大作乃止不復有仕進意矣君性灑脫常與朋儕觴詠豪情勝槩酣嬉淋漓談諧閒作一無所避握臯者望望而去爲學海堂學長及同文館主講遇後輩才雋獎借不去口有告急者傾囊與之弗吝或質衣貸之生平頗切用世乃迄不得遇徒以詩詞擅名非君志也光緒七年九月十三日卒年六十八著有梅窩詩

鈔二卷詞鈔一卷配室韓宜人子吉蘭以八年某月某
日葬君於東門外某某之原君與余交數十年病彌留
執余手以誌墓爲託余敢不諾君也乃銘曰

輪囷之材不貢廊廟偃蹇空山風嘯雨嘯鬱作奇葩清
馥妍妙沈沈幽宮白日不照一卷長留孰發其耀後世
子雲豈無同調酌君九泉斗酒宜酌

庾園何君墓志銘

君諱秀棣字輝章一字岳緣南海西樵人也曾祖景盛
祖彩士父允綱有子四人君最長樸訥渾厚閑逸和雅
讀書外無他嗜篤於內行父歿以失養爲憾遇諱日終
其身戚戚然事母張太孺人先意承志務得親歡負笈
寓羊城友或召之飲輒別自具饌寄歸曰吾母未嘗此
也仲弟年三十遽卒撫其孤女如已出叔季兩弟復先
後夭折母哭子成病君慰藉百端母病爲起至年七十
乃終君居喪毀瘠如不欲生從父某生計甚窘君給其
家不使缺衣食從父卒復撫其孤子至於成立以故鄉

黨言孝友咸稱君君寡交游不慕榮利三試不售便不
赴考場顧喜爲詩客羊城時嘗與二三知交爲墨花吟
課其標榜聲氣之士輒避之旣而歸西樵葺庾園爲偃
息地閉戶不復出鳥嘯花放日手一卷濁酒一壺陶然
自樂而已鄉人皆重君其不逞者欲聚門聞君至棄械
潛遁故遇事非君莫決而君顧不得常見生平精岐黃
術活人輒效而亦不常爲人治病也君卒於光緒辛巳
年十月二十日春秋六十有五所著有庾園詩草二卷
配莫孺人子四文耕文佐文倣文佃耕與佐早卒孫一
汝浴文曰女孫一以明年正月十五日葬君於西樵裏

金星岡之原余與君交數十年不能辭誌墓之請也乃并爲之銘曰

孝友莘莘先民是程樵山之下澹然寡營嘯歌一室不出戶庭以內爲重於外則輕人愛碩德歿垂令名金星灼爍莘於佳城後有達人曜子幽貞

梁芷湘戴姬壙志

余宰安成延梁君司出納君攜姬住解中家人日與習
余內子尤相契常歎世之爲妾者罕似姬賢也余奉諱
歸君亦攜姬附舟反僑居城西數年矣昨君忽過余流
涕爲言姬病死并述姬柔淑姑嫜大婦無閒言又言己
饑驅姬相隨跋涉備嘗艱險居常減衣縮食儲蓄至數
百金悉以應己不時之需亦時濟戚鄰之乏者大婦無
子姬亦無出歸里後力謀置遑遑舉一子姬大喜保抱
攜持如己出逾年姬病子亦病力疾爲子評量水藥不
自顧也而子竟死姬病己不支傷痛遂卒君言至此不

成聲閒曰噫子盍銘我姬乎余感君情且稔聞姬賢不
復辭姬江西人卒於同治十一年二月二十二日年五
十有二君乃葬姬小北門外鳳凰臺之原爲銘曰

銘姬德誌君悼也君匪衿袂之愛而箕帚是寶也分雖
卑足式婦道也

朝議大夫知府銜署荆門州知州潘君墓志銘

君諱亮功字熙績堯臣其號也番禺人曾祖鍾侶本生曾祖寵賜祖贊軒父清選邑生員候選訓導俱以君貴誥贈通奉大夫君幼端重不與羣兒嬉長嗜讀足疾不履地者三年而讀弗輟中道光己亥科舉人君賦性沈毅處事安詳素有用世志辛丑之役當事爲取石塞海計奸徒藉以鑿石礪山山捍蔽會垣邑南數十鄉倚爲屏障適君北游歸率眾具稟上官山得保全咸豐甲寅紅巾四起會城戒嚴沙莢紳士與君謀團練隨官兵攻破新造市橋鍾村各賊巢事平君迭主岡尾沙莢兩局

復議建賁南書院與諸紳合力安拊良善君於未仕時
已能枝拄鄉閭如此當事稔其勞奏請以知縣歸部銓
選戊午授湖北羅田縣時長髮賊踞金陵屢擾湖北羅
田亦已陷君慷慨之任賊遽竄乃下車安民課士從容
料理於縣轄東北險要處建碉樓七并繕治平湖奉泰
兩鄉寨堡大府善焉飭各屬取爲法由是悍賊陳玉成
屢犯楚北不敢復闌入羅田同治壬戌調任漢陽漢陽
楚北首邑九省通衢時西人通商漢口髮賊竄跡於鄰
封洋務軍防絡繹不絕君不動聲色措置裕如大吏才
之踰年陞隨州知州加同知銜到任甫八日捻匪張總

愚竄至前令皆不習守城君立修戰守之具下令州民
近者歸城遠者歸寨民爭趨城晝夜守陴君與同甘苦
賊知有備將竄左侯督師赴陝甘取道州屬之唐縣鎮
君夜馳以告侯嘉其勇爲整隊而前賊聞之宵遁臘月
賊復至圍城君戰守四越月民心益固而軍火不繼適
僧王軍自棗陽馳援至城東南殺賊無算翌日君親率
士卒出奮擊僧邸撥馬隊截賊後復殲賊萬餘圍乃解
甲子八月僧邸剿賊復過境君供軍食無缺僧邸特委
察各營戰事知君篤實可信任也乙丑以卓異引見旋
復任軍務漸平君乃葺衙署繕文廟修志書增書院膏

伙大比設賓興費疊疊不倦戊辰權武昌霆營兵噪餉
君彈壓使出境至崇陽潰變君得無事祝陳兩姓爭湖
構訟康熙以來案不能定君到一訊卽結邑驚爲神縣
前江後湖催科向以爲難君知蠹吏與豪戶爲弊力懲
治之歲終悉完納己巳加知府銜權荊門直隸州州在
萬山中民氣朴愿本可卧治惟時秦隴棧道未通喇嘛
象貢往來取道於此又沙陽一堤當襄河巨衝修築未
能少息焦心勞力仍鮮暇時而民免爲魚至今輿頌此
君筮仕不避艱險弭灾捍患勝任愉快者也辛未再引
見以同知直隸州陞補君請修墓廨歸遂不出君工制

藝未仕時授徒歲數十人多得氣以去既仕充丁卯庚午兩科同考官俱得人任羅田日有同鄉顏仰庭爲多雲司巡檢孤身宦歿囊積千金君爲訪其親屬更飲助以歸其櫬歸田後以先代產薄墳墓遼遠捐出汶州田畝爲祭流復積義會以裕嘗產邑有公事諸紳輒推君爲祭酒如辦沙田捐輸籌邑新進冊金悉藉君以有成癸未八月軍機處行文下縣詢君近狀大有起用意而君以年老多病辭是年某月十九日竟以病終里第春秋六十有九配室廖氏覃恩誥贈恭人繼室蔡氏覃恩誥封恭人俱先君卒子三煥琦候選詹事府主簿煥珂

煥璟俱國學生孫五德尊務學務成務澍務藥女三長
適鄔次適何三適陳以某年某月某日葬君於某某之
原煥琦以君狀來乞志墓余與君同里黨少相習咸豐
之役復嘗共事不敢辭乃按狀書君事於阡并爲銘曰
強力粹德古有能吏力以禦亂德以撫字功能及民不
必高位一官一邑績自殊異惠在黎元澤流後嗣疊疊
雲山葱葱佳氣治譜長留靈官永閔

鶴山縣訓導招月航先生墓碣代

先生諱廣濤字盛藻一字月航號幻華南海之橫沙人
曾祖諱仲山祖諱順天父諱賢書奉直大夫布政司經
厯加二級先生其季子也生有異稟讀書五行下弱冠
補博士弟子員踰年食餼道光十五年以明經爲廣文
攝連山教諭篆十八年署鶴山訓導先生性伉爽愛獎
寒畯連山有書院學舍傾圮倡謀新之適解任猶助百
金新進弟子來謁貧者却其贄其行義多類此有榦才
辛丑之役英夷舟犯泥城攻四方礮臺擾及會城西北
諸鄉落先生適丁杜太宜人憂家居距泥城僅一水鄉

人皆驚走先生堅止之連結潯岡洲一十五鄉爲守禦計勢大振眾始安會城避兵者反來就焉先生於是欲率丁壯渡水焚夷舟會當事議撫而罷然是時大難雖解人心易搖先生乃倡建潯峰社學使十數鄉守望相助出入相友復合昇平社學爲之聲應於是乎民氣愈固盜賊衰息十餘年來潯岡一洲得以優游作息良莠無雜者先生力也嗟夫當世需才甚亟近歲寇賊蜂起中原輟轡使先生得宣力其間或剿或堵當有奇績而竟以一羶終何耶先生生平孝思最篤爲奉直大夫立廟顏其旁軒曰終慕曰居其中又嘗走數千里冒風雨

不避涼燠爲先人營葬地故晚於青烏術甚精少好遊
往來羅浮鼎湖及東西江虎門師海閒司鐸韓川聞北
江諸勝靡不紆道往又長於詩胸有所發時時託於韻
語所著有不爲齋集其貽子孫不以貨財聚書數千卷
曰此美田宅也噫先生之才旣不得大用而一言一行
要足爲士大夫法式故備載如此此求之古人何多讓
乎何多讓乎先生生嘉慶某年十一月初一日終咸豐
二年八月二十三日享年五十有六配陳孺人同邑亭
岡鄉國子監生諱世榮女子二駿國子監生仲敷南海
縣生員女二長適石次適梁皆同邑人孫六登奎登鼎

登庾登熊登移登弁以咸豐三年八月十二日葬先生於白雲山麓石鼓嶺攬園之原銘曰

潯峯嶢嶢有木十圍榱棟之質厦宇是資匠石不至偃蹇於時徒以厥桷榑柱里閭嗚呼先生吾道若斯

祭黃義婦文

維咸豐五年沙灣菱塘諸鄉土寇盪平某等追感義烈
以某月日敬祭黃義婦之靈烏乎時會晦盲屯否兇慙
燄張郡邑雲委井螳墟蠡閭虵巷豕智噤愚和兄勸父
使誰歟深識守義自矢倬哉義婦狂俗是恥痛我良人
橘儵化枳法異旣窮挽阻奚恃順逆爾昧伉儷曷以從
亂者賊胡可婦彼志定愛斷節植恩徒熒熒兩孩賊種
弗子渠渠夏屋賊宅弗止池清可遊酖甘如薺投繯乃
絕再生再死緬茲義烈在昔罕比弱質婉孌如古志士
愧彼須麋振此頽靡厲世摩俗扶綱樹紀遺風孔彰百

尺牘草堂遺文卷三

三

世興起魂兮有靈歆茲謦旨

祭伊善卿文

嗚呼天道否塞玉折蘭摧善乃罹禍栽者不培君幼而
穎斐而知裁求是以學并達於才隸首之奧幾何所推
隳泚析纖竟委挾茲或溢爲篇輝輝焯焯溫恭孝友尤
足溯洄斯世斯人實有用材天胡不惠戚施其骸雖廢
其躬其學日恢胡虐不已二豎爲災甫踰三九中道隕
隳我披君帷如聞君歎我酌君酒君兮不來君有白髮
君心哀哀君有黃口君意徘徊我壻君弟尤君所懷天
實爲之君其瞑哉

戴枚生誄

某年月日枚生戴君以疾卒嗚呼痛哉君畀質慤誠植
行凝卓髫髻之日已類成人趣尙所存迥異流輩聞善
而喜如汎瀾之赴川嫉惡若浼同飛艤之避石吳歛楚
豔能去於耳目韓盧季雛靡入於嗜好慙炫耀以干祿
赧鑽營以取名奉親則孟荀姜鯉罔憚其難交友則季
裘冉秉斟形其吝恂恂乎儒者之範芟芟乎善人之裒
賁志未完儵櫻沈痼醫難措手藥不回春蘭竟刈於當
門松遽彫於未雪潘岳二毛之日尙餘一年顏回夭札
之秋且先三載嗚呼痛哉今夫彭殤命也修短數也賢

愚齊於一邱生化宰於大造以君素達夫奚以悲然而
危城欲崩難迴杞婦之泪遺篋未具罔釋郅親之痛中
郎有女纔能扶床伯道無兒莫問主器此則浮雲黯黯
靈均之魂徒招帷燈熒熒荀偃之目猶視者矣嗚呼痛
哉璞於君山角測交筆硯同事公瑾終窶承子敬之指
困仲宣名卑蒙伯喈之倒屣晷景旣延襟襟偶判君逝
旬日璞始獲耗人事交迫未獲奔哭追念曩歲竟成永
訣嗚呼痛哉探梅邏寺已化黃公之壚聽雨越岡咽甚
鄰人之遂爰擬河陽誄彼孝若其詞曰

芄芄蒯菅靡覩萎滅英英蕙荃屢傷摧折摧折不已復

令歇絕天問沕穆地理鬱結矯矯戴君載端載潔志峻
卑嶽衷堅磷鐵削踪俗武躡跡曩哲假之以年詎遜偉
傑玄穹靡佑逝矣如瞥征途尙遼遽淹軌轍修榦旣槁
復遏萌蘖嗚呼哀哉何以爲說

鄒徵君南海地圖贊

南海爲邑幅員遼闊閭井相望山川緜邈險要阨塞高
下頡頏西承牂牁東界番禺綦布絲絡田隰原野方邪
迂直途術交錯施之尺幅如印加泥如金出范如貌在
鑑纖洪不遺復不凌犯誰能圖之布策運法維鄒徵君
遣二弟子記里準方亥步八垠裴氏六法曠古不傳徵
君實勗甫圖一邑圖成君逝是可寶藏

霍文敏王文成論學圖像贊

陽明德業爲當世師正嘉之際矜言良知侃侃霍公直
諒自持賢智之過曾以書規章門會晤唯唯否否天子
諫臣大儒諍友當時圖者不知誰某以示折衷亦知道
叟

龐弼唐霍勉齋兩先生像贊

前明霍勉齋師於弼唐龐氏此圖師弟皆老年
矣龐眉皓首聽受宛然其裔孫霍履初特以屬
題敬爲贊歸之

南州理學正嘉爲昌陳湛而後實維弼唐理蘊探奧榦
濟用彰處抱懿德出作循良晚謝簪組樵山尙羊翬翬
勉齋早在門牆波瀾不二用行舍藏爲懷爲仕與子偕
臧白首討論侍坐於旁繪此圖像示永不忘

題鍾香巖小像

邏岡之地峯岫迴環丹荔萬樹玉梅四山君生於是貌
暇意閒抱真守淑歎咏其間昔我來遊款君柴關梅花
正開水石潺潺對酒林下仰眺烟鬟導我登陟層雲共
攀一別廿載我歸人寰昨寄此圖鶴髮松顏精神猶昔
逸興未刪想君花下猶自往還

陶靖節像贊

君子之仕唯道是以祿可萬鍾何五斗米道之不行病
乎違己惟祿是求折要則恥貧無戚顏道勝乃喜賦歸
去來亦非得已義熙以還但書甲子

虛谷黃先生像贊

懿歟我師含純履軌道積厥躬才不外銜行不內愧事
不苟同說經硜硜以誘以掖教思無窮抱質而處德潛
弗耀天鑒厥衷錫以純嘏龐眉皓首有粹其容遺徽尙
在是仰是放瞻拜敬恭亦和亦介百世興起夷惠之風

老婦頌

幡幡良士人重老成豈婦之老不爲典型弗求刺繡猶
供箕帚弗事枕衾尙堪井臼粉黛罔費綺羅匪存姬姜
莫擬保傅宜尊不期而貞不節已儉居誰爲容出免蔽
面頭童齒豁曩亦麗顏昔曾承愛今胡不歡修眉連娟
伐性之斧惟此老婦錫汝純嘏

尺岡草堂遺文卷之三終

男衍緒校字

尺岡草堂遺文卷四目錄

擬廣東儒林傳

馮經鄧純

擬廣東循吏傳

謝仲坑馬福安

擬廣東文苑傳

易宏何彬吳蘭修陳在謙

吳應逵陳曇譚瑩李光廷

陳良玉鄭棻莫元伯李黼平

何若瑤方殿元蘇珥呂堅

劉彬華 黎應南 崔 弼 凌揚藻

李士楨 黃子高 居樟華 黃培芳

黃玉階 張炳文 胡燕方 溫承恭

跋玉烟堂章草諸刻

跋蕭子雲出師頌

書鼎帖索征西出師頌後

書鼎帖索征西月儀帖後

又

跋玉烟堂本十七帖

又

跋智師真草千字文

玉烟堂董帖題後

又

題趙芬殘碑

跋孫率府書譜

又

跋書譜釋文

同州聖教序書後

又

尺岡草堂遺文卷四目終

尺岡草堂遺文卷之四

番禺陳璞著

擬廣東儒林傳

馮經字世則南海人

府志

左目失明其一僅辨字畫每觀

書必俯首於案目光去紙不一寸作字尤艱苦或汗汗

其卷不復成書故爲諸生考輒下等

吳應達馮來廬先生傳見雁山文集

而讀書強記絕人攻治益力

府志

大興翁方綱學使試古

學得其經解則大驚以爲得未曾有

雁山文集乾隆庚寅舉

於鄉官教諭其學覃精鄭孔而立身行己髦髦然規仿

關閩初甚拘苦後讀詩至衡門之下一章怡然自得曰

此君子素位不願外之說也孔顏樂處豈外求哉授徒

三十年硜硜講說不倦來學之士至廨舍不能容府志嘗

曰說經必統會一經之始終而融貫諸經以證之其說

乃確不可易雁山文集諸生有問難者輒色喜曲爲開導務

使明達謝蘭生撰傳至誠感人終身未嘗有曖昧事免母喪

已踰年講論語至喜懼兩言嗚咽泣下不成聲門弟子

皆起立動容遂罷講雁山文集卒年七十八著有四書講解

周易畧解詩經書經畧解攷工記注羣經互解算畧等

書皆薈萃儒先貫通其說而尤邃於易其擇卦象以十

翼爲據釋爻辭以彖辭爲本河洛之數以周髀經爲宗

而旁及於筆算籌算隨手指畫不差抄忽云

採訪冊

鄧純字粹如一字樸庵東莞人

嶺南文鈔

少有高志讀書郡

城北之三元宮獨愛白沙陽明諸集稍稍習靜行導引

術有得旋讀程朱遺書乃悟其非遂棄去不事遍讀歷

朝儒先書有志正學一言一動日記之爲乾惕錄

面城樓集

鄧徵君別傳

復博涉羣籍嘗搜訪粵東故事著嶺南叢述六

十卷又輯粵東名儒言行錄二十四卷

嶺南文鈔

茶山家譜

主一齋隨筆家範輯要寶安詩正若干卷性尤廉介不

苟取於人嘗歲饑傾貲賑族人米又好書往往棄產購

藏用是家益落而終不易其操道光元年舉孝廉方正

當是時自督撫至知縣皆耳其名而純未嘗私于私
以貧病卒年七十五

面城樓集

擬廣東循吏傳

謝仲坑字孔六陽春人

阮通志

學使惠士奇所得士

肇慶府志

綜貫經史卓然負文望中雍正癸卯解元登明通榜初

任長甯教諭

阮通志

陞授湖南平江令甫下車首興學校

折獄多所平反

府志

厯衡陽衡山性廉介長於吏治明晰

秋毫案無留牘以巴陵審案撫臬互奏奉

命引

見陞荊州通判

阮通志

奉檄清釐兩湖大獄二百餘案

府志

又以歸州縱盜寃良案堅不會印

特旨召對擢常德同知厯知襄陽寶慶宜昌武昌永順

岳州永州七府署永郴桂道仕楚三十餘年所至興利

除弊潔已愛民有謝青天之目爲大僚倚重

通志

嘗撰句

云縱有饋遺都却去更無情面可求來其巴陵歸州桂

陽命盜三案至棄官爭枉直直聲聞於

朝謳歌浹於野

阮通志

解組日貧如故

府志

卒民以神明事

之

通志

馬福安字聖敬又字止齋順德縣人少聰穎讀書數行
下嘗夜讀文選班孟堅兩都賦鼓再下背誦不遺一字
然好先儒語錄立志與古賢豪相頡頏不屑以記誦自
域嘉慶二十四年舉於鄉道光九年成進士改翰林院

庶吉士散館授四川犍爲縣知縣既上事卽議裁陋規

將次第行之

西城樓集馬君家傳

丁內艱歸癸巳療荒先後捐八

百金賑其鄉服闋擇發福建署順昌縣

廣州府志

順昌當

閩南北衝故多盜長汀兵餉過境被搶先是縣有劉三

妹者大猾也與胥吏勾通前政厯緝之不能獲

家傳福安

獲劉三妹使偵獲十

人

府志

果巨魁解諸省大吏才之

題沙縣知縣委署詔安縣忌者甚諸盜翻供詞坐失入

罪落職詔安民誤以爲虧空也置十櫃通衢投之錢一

日得錢五千貫君不取強之乃舉以益育嬰堂孤老院

書院諸經費當是時民皆不平福安獨泊然置度外至

省寓候部議延建邵兵備道徐繼畬聞之憤然曰馬令
所獲十一人有經某親訊無異詞者乃謁督撫白其事
總督鍾祥令當堂訊得實乃奏請開復巡撫吳文溶初
至知其爲吏廉欲委善地爲調劑計而福安請漳浦巡
撫曰漳浦罷敝不可重累君謝曰公爲地擇人不爲人
擇地且漳浦民陷水火久某不敢避難坐視遂署漳浦
家漳浦俗尙械鬥邱梁兩大姓鬥輒不解府志命案積數
一百蓋歷十餘年矣至執巨盜四人斃杖下家傳挈役數
人親赴諭以利害兩造遂散受傷死者當時斷結不擾
事外一人府志爲捐廉設鄉約命兩姓公舉族正分治之

由是東西北三路聞風凶暴之俗頓革

家傳

其後奉檄往

漳州道出詔安沿途香燭迎送巡撫疏薦擢知六安州

丁外艱

府志服闋引

見奉

旨仍發安徽到省邸病卒年五十八

家傳

福安學有根柢

兩廣總督阮元創學海堂以經史詩賦課士舉學長八

人福安與焉

府志

性孝友愛其庶弟過於所生父母有不

豫色卽長跪以請在鄉黨恂恂然而事上官則伉直不

少屈居嘗儉約十年不易一衣及卒幾無以殮著有鑑

語經世編十六卷明代名臣傳贊十二卷止齋文鈔二

卷貞冬詩存一卷藏於家

傳

擬廣東文苑傳

易宏字渭遠號秋河亦號雲華子原藉新會人雍正中

分新會縣置鶴山遂爲鶴山人

雲華閣詩畧跋

康熙初題詩海

幢寺制軍吳興祚見而奇之延入幕爲上客

陳在謙撰墓記

先

是幕客有王礎臣周萬山者皆名下士適元夕遇雨制

軍命同賦粵臺春雨詩自擊鉢催之遲者罰三爵坐客

皆困宏應聲立就

吳應達撰易秋河傳

吳公大喜擊節酌酒以賀

由是名聞一時既而吳公遷藩陽與之俱

墓記

因徧歷宇

內五嶽登其四

詩畧跋

凡高賢古蹟仙靈窟宅綺羅勝場

皆有詩

墓記

其後罷遊歸寓端州法輪寺謝絕人事以著

述自娛

吳應達撰傳

未幾卒無子寺僧葬西郭梅菴右

詩畧跋

所著道德經注金丹會緝青山外史俱散失惟雲華子

詩集坡亭詩餘尙存

吳應達撰傳

詩清麗芊綿閒作蒼涼沈

鬱之句在

國初名輩中亦可云秀絕人寰者

詩畧跋

吳

公題其集有云思入風雲傳絕響力窮天地識驚才傾

倒至矣

詩畧題辭

何彬字公度高要人

陳在謙撰二何傳

少穎悟所學輒入室讀

聖賢書外通星算嫻絲竹尤精鼓琴

陳在謙二十六洞天草堂詩鈔序

性樂易談詩娓娓不絕

二何傳

所至皆有詩其詩超遠粹

和若不費思索而妙中人心

陳序

有隱孝嘗割臂療其父

二何兄弟白首如童孺通脫喜言論處困極無機心彭泰

來三十六洞天嘉慶丙寅丁卯閒窮益甚由陽江返新

甯寓東郊寺日糴二升米與寺僧其炊折足鐺久之賣

卜於開平之長沙居數月人無知者陽春譚敬昭道長

沙遇之於市握手還舟中於是長沙富人梁某推大宅

舍之而令其子弟與之遊二何傳著有三十六洞天草堂

詩存二卷許乃濟撰何叔度墓志弟元字叔度幼而嗜學九齡能

屬詩文與仲兄公度齊名墓志大庾相國戴文端公督學

粵東以二何目之欽州馮敏昌主端溪講席益重元肇慶

府志故與惠州太守伊秉綬友善常從泛舟豐湖賦詩飲

酒甚歡太守去官

二何傳

因爲書介元於曾方伯燠居藩

幕數年詩文外談不及他

志府

其爲詩思深而力沈去雕

返渾取精古人而能孤行其意

彭泰來江上萬峯樓詩鈔跋

二十爲

諸生旋食餽五十充歲貢才豐而命嗇名泰而身屯

陳曇

撰何明經傳

與兄彬並以明經老焉

二何傳

輯有五律權輿四

卷著江上萬峯樓詩鈔四卷紅蘭江館文集一卷

府志

吳蘭修字石華嘉應州人嘉慶戊辰舉人官信宜訓導

嶺南羣雅

道光紀元與曾釗吳應達林伯桐張維屏黃培芳

張杓鄧純馬福安熊景星徐榮溫訓謝念功黃子高胡

調德結希古堂課治古文辭越二年兩廣總督阮元立

學海堂以廣之兼治經解詩賦

留劍希古堂攷課序跋語

蘭修枕經

薛史無所不通

江藩南漢紀跋

工詩文

續人傳

其古文有二種學

六朝者得其韻學八家得其法集中論事之作尤通達

治體切中事情治史精於考證

嶺南文鈔小傳

南漢輿地沿革

考覈精詳尤非任臣所能及

南漢紀跋

自榜其門曰經學博

士藏三萬卷書

楚庭耆舊集

道光壬辰三四月間米驟貴長

樂耆民請禁米出境縣令從之蘭修以書抵縣謂遏糴

召亂民果藉端發難縣令悔乃弛禁於是米船通行市

價日減道路帖然

嶺南文鈔

兼擅算學曾序李侍郎黃輯古

算經考注立言無多要能直揭王氏之旨非深於古法

者不能道

續疇人傳

又撰有方程考末載通御附辨二門如

算法統宗有孤鵬不知數一條用頭尾相減爲其數固

誤梅文穆公赤水遺珍改定爲兩尾相減餘爲法亦非

通法因悟得用方程法御之始無窒礙其他不勝枚舉

要皆有功於九數者也

羅士林續疇人傳論

工倚聲直接北宋人

之脈南渡後諸子當與雁行其嶺外之白石翁玉田生

乎

茶村詩話

刻有南漢紀五卷南漢地理志一卷端溪研史

三卷荔枝吟草桐華閣詞鈔

楚庭耆舊集

陳在謙字六吉號雪漁新興人嘉慶九年舉人官清遠

縣教諭

端人集

自爲諸生好治詩古文

彭泰來撰傳

與番禺陳

墨高要彭泰來兩明經相切劇

李光廷撰文勺序

固守八家軌

轍而有真氣者

張維屏撰文勺序

爲人簡易清直通不掩介遇

流俗無忤色氣類所契亦無溢情人莫得而親疎委監
越華書院嘉禾錢侍御儀吉客游粵與之善及去爲文
送之其論文之要曰不失真論人之要曰本色在官月
以俸錢給寡妹與亡弟之子其他任卹之事非一自少
往來南北又嘗客山左游跡所及多見於詩道光十八
年卒於官所著夢香居集十五卷七十二峯堂文勺四
卷選嶺南文鈔十八卷

彭泰來撰傳

吳應遠字鴻來一字雁山鶴山人乾隆乙卯舉人

嶺南耆舊

集

福建知縣改官教諭槐炳子也

端人集

性和易近人喜

談諧以古文名嶺外者數十年

茶村詩話

辦香魏冰叔其表

揚節義之作動色驚心不遺餘力

嶺南文鈔

著文集四卷詩

集若干卷嶺南荔枝譜五卷荔枝軒筆記二卷

茶村詩話

陳曇字仲卿番禺人充府學生員天資穎異襁褓中能

屬對年十三已讀十三經稍長通史學尤熟兩漢南北

史汀州伊秉綬見其詩奇之南城曾燠藩粵亦器重曇

以小鳳皇爲喻

縣志

四方文人來嶺海無不知陳仲卿者

性伉直篤風義與人語百否一可一言之善則好若已

出

彭泰來撰墓志

生平慕鄺湛若之爲人顏其齋曰鄺齋

縣志新

會商濫祀鄉賢與同縣舉人劉華東合廣州士百餘人

訟於制府對簿抗論不屈卒撤其主罷祀

墓志

晚以貢生

候補訓導署揭陽教諭年六十八卒於家

府志

爲文喜六

朝駢散皆有古法至於哀樂無端眄睠無旁奇懷內紆

萬感並入則壹發之於詩

墓志

著有海騷四十卷感遇堂

駢體文四卷鄭齋隨筆四卷

縣志

譚瑩號玉生南海人道光二十四年甲辰舉人官化州

學訓導升瓊州府學教授加內閣中書銜幼穎悟於書

無不窺尤長於詞賦年十二作雞冠花賦看桃花詩老

宿驚賞之弱冠應試時儀徵阮元督兩粵以生辰避客

往山寺見瑩題壁詩文奇之

府志

告縣令曰縣有才人宜

得之令問姓名不答已而得所爲賦以告公公曰是矣

陳澧撰墓志

遂以縣考第一入泮督學爲長洲顧元熙亦賞

其賦有六朝胎息道光初阮元開學海堂於粵秀山以
經史詩賦課士見瑩所作蒲澗修禊序及嶺南荔枝詞
百首尤爲激賞自此文譽日噪凡海內名流遊粵無不
慕交者道光六年常熟翁心存督粵學以授心扇賦試
諸生瑩居首列時值西陲用兵府志覆試題爲收復回城
賀表瑩文十千餘言援筆立就學使評其卷曰粵東雋
才第一

墓志

繼翁任者爲平湖徐士芬閱其歷年試卷亦

有騷心選手獨出冠時之譽遂以優行生入貢顧瑩聲望雖高鄉場屢黜前後典試如壬辰程恩澤癸卯翁同書榜後咨嗟以珊瑚未收爲憾至甲辰始列賢書然瑩澹榮名計偕後不復北上受教職無事得以肆其搜覽縣志博考粵中文獻凡粵人著述蒐羅而盡讀之其罕見者告其友伍崇耀彙刻之曰嶺南遺書五十九種曰粵十三家集一百八十二卷選刻近人詩曰楚庭耆舊遺詩七十四卷又博采海內書籍罕見者彙刻之曰粵雅堂叢書一百八十種墓志前後委管學海堂學長粵秀越華端溪書院監院自著有樂志堂詩集十二卷續集一

卷文集十八卷續集二卷兩修邑志一修府志府志稿未就而卒年七十三

府志

李光廷字著道一字恢垣番禺人道光己酉拔貢咸豐辛亥舉人壬子進士籤分吏部以主事用癸丑假歸值粵中盜起與里中紳士團練總沙焚局事鄉里藉以安大吏奏獎補員外郎戊午入都供職庚申天津之役人情洶懼曹吏散避光廷獨留不去入部治事如故尙書全公大學士周公甚重之辛酉事大定乃乞養歸長官其留之不得歸主講禺山書院爲學海堂學長復掌端溪書院修廣州府志終養竟不復出

墓志從事編簡二十

年如一日待人處已眞實勿欺發爲文章悉能流露眞

意

方濬師宛湄書屋集序

著有宛湄文集十卷

墓志

集中有古文有

駢體文有考據之文又別有詩集

陳澧撰宛湄書屋集序

善言地

理南北往返所至必詢其山川險要疆域道里手錄而

詳覈之著漢西域圖考七卷

墓志

自漢敦煌關外西北二

萬里至大秦又西北至於海西南萬餘里至安息又西

南至於海其間國土以百數若指諸掌自漢至今史傳

說部以至沙門之記錄外夷之圖繪靡不綜覈方言譯

語侏離啁哳同地異名同名異文靡不通貫可謂奇書

矣

陳澧撰漢西域圖考序

又著廣元遺山年譜

墓志

凡遺山之詩文

可因其地而知其時遺山詩千三百六十一首考得時

地者千二百七十九首其不可知者八十二首而已

陳澧

撰廣元遺山年譜序

又有北程考實二卷生平磊落自喜

墓襟懷志

夷曠有魏晉閒諸賢之風性復喜客戶外之屢恆滿

陳良

玉撰宛湄文集序

親友有急力爲經營與人交無城府而能面

折人過年六十九卒於端溪書院

墓志

陳良玉字朗山一字鐵禪廣州駐防漢軍少嗜學無所

不窺尤熟史部遺文逸事記誦不遺善詩工倚聲道光

丁酉舉於鄉名益起新甯令李延福耳其名迎之課子

相得甚歡縣有富人訟不得直託人以千金求與令言

張目斥之去署中人目爲迂夫子令愈重之選通州學

正數年以知縣陞用後儘先補直隸州丁母憂歸服闋

將赴部瀕行足疾大作乃止不復有仕進意矣

璞撰志居

近越王山麓闢地種梅以梅窩名其齋

陳澧撰梅窩詩鈔序意度

宏闊通達事理論古往往抉摘得失出人意見談天下

事推究所極洞見癥結其後輒不爽

璞梅窩詩鈔序爲學海堂

學長及同文館主講遇後輩才俊獎借不去口生平頗

切用世乃迄不得用以詩詞擅名非其志也卒年六十

八著有梅窩詩鈔二卷詞鈔一卷

墓志

鄭棻字子幹一字棉舟番禺人諸生

楚庭耆舊遺詩續集負異姿

詩章瑰麗

縣志

矢口肆筆而成與會淋漓哀感頑豔

耆舊續集

早喪偶南海招子庸愛其才以女妻之

縣志

與人落落難

合不善飲而幾同罵坐灌夫

譚瑩海天樓詩鈔序

其實中詠古七

律三百首一唱三歎如聽雍門之琴如聞燕市之筑

茶村

詩懷仙七律一百首明麗芊綿置之太樗堂集中恐前

賢亦當畏後生也

楚庭耆舊遺詩續集

顧家甚貧連不得志於有

司落魄以歿年僅三十四著有海天樓詩鈔

縣志

莫元伯字台可號善齋高要舉人嘉慶十三年大挑二

等銓授番禺縣訓導十七年截取知縣以母老辭在任

七年疾歸卒於家元伯質慧而醕文行兼飭性至孝弱

冠家貧授徒所入悉以佐甘旨父歿毀瘠服除後館於外遇朔望猶必設位而哭及門皆感動爲之流涕母稍有病藥餌必親衣不解帶性豪飲母戒之乃作止酒詩絕飲純孝之稱播遠近焉宏獎士類樂而忘疲條陳章程上督學盡除積弊課諸生親校藝指示誘掖諸生咸奮每課常百十人丁祭諸生不願胙亦不親祀事元伯特召集諸生講及禮儀禮器捐俸加胙徧及諸生四方聞風來學歲常數百人學舍至不能容一時受業者多所成就生平重然諾無僞語人亦不忍欺篤於宗族故舊有貧者務拮据以賙之布政司曾燠學使程國仁彭

邦疇咸敬異元伯每接見談論終日而元伯語不及私
歿後兩郡生徒咸造廬哀奠會葬爲近所罕見著有四
書講義讀史摘要四書史證柏香屋詩鈔等書同治三
年十二月奉

旨入祀肇郡鄉賢祠

番禺縣志
宦績傳稿

李黼平字繡子別字貞甫嘉應州人嘉慶乙丑進士翰
林院庶吉士乞假南還大吏耳其名聘主越華講院連
兩歲戊辰入都散館改用知縣謁選得江蘇昭文泣事
一本寬和慈惠爲宗獄隨至隨結無苦候者讞案尤不
忍用鞭扑公餘卽手一篇民間因有李十五書生之目

以虧擲揭參落職繫外臺獄數年制府阮公延入節署
授諸公子經會開學海堂以經史詩賦課士屬爲定甲
乙復主東莞寶安書院教育士類文行兼勸人咸愛重
之卒年六十又三著有易刊誤二卷毛詩紬義二十四
卷文選異義二卷讀杜韓筆記二卷堪輿六家選註八
卷詩四集曰著花菴集八卷吳門集八卷南歸集四卷
續卷四卷賦二卷制藝四卷

番禺縣志稿

何若瑤字石卿番禺人少穎悟讀書百數十行十三經
皆能成誦十一歲居母喪哀毀如成人常捧母奩飲泣
恨不以身代道光戊子中舉人七赴禮闈庚子大挑二

等選海康訓導辛丑成進士改翰林院庶吉士甲辰散館授編修戊申補授右春坊右贊善己酉丁父憂服闋回京癸丑丁繼母憂歸遂不復出甲寅紅匪作亂變起倉卒若瑤鄉居擬團練不及幾被害乃微服走會城圖勦賊是時賊氛正熾沙灣則何博份鍾村則李阿計猛涌則林洸隆新造則陳顯良各各盤踞其黨散佈村落者以萬數又有賊艘千餘往來內河隔絕城鄉聲息不通士紳之居鄉者皆爲所阻遏不得出若瑤乃與二品銜梁綸樞請於制府開局城西籌餉募勇以爲之招於是沙灣茭塘兩屬士紳稍稍出乙卯正月謀定遂同官

軍進攻若瑤遣練勇直入大樞圍之市頭扼其中樞各鄉義民間之羣起相應不三日而神頭猛涌新造諸賊一掃蕩平若瑤於是復與士紳定議移局南村安集善良搜捕餘匪又改建局爲賁南書院以總沙茭兩屬之事大吏嘉之擬請獎叙若瑤辭焉悉以讓諸同事知縣李福泰深重之丙辰延主禹山講席並請總纂邑志發凡起例未成書而卒年六十若瑤爲人靜默恬澹遇事鎮定有執沈幾觀變不動聲色事成而已若無所與未獲大用於世識者惜之生平勤學嗜古所著有公羊註疏質疑兩漢考證海陀華詩集文集等書

縣志稿

方殿元字蒙章番禺人順治甲午舉於鄉初應禮部試

往來齊魯鄭衛吳越間見民困俗偽乃考古酌今為昇

平二十書十八年至京師欲上之值大事不果康熙三

年成進士縣志歷知郟城江甯縣能以經術飭吏治引疾

去僑寓蘇州猶於故里實祭田百畝且以田給兄弟之

貧者鄉人稱之縣志著九谷集其詩高華伉爽不在嶺南

三家下又著環書究天人竅奧自成一子國朝詩別裁子還

著靈洲集朝著勺園集居吳俱以詩名廣東通志

蘇珥字瑞一順德人性脫畧不羈然篤於學嘗掉臂遊

市中且行且誦人莫能測縣志詩有別趣粵臺徵雅錄惠士

奇稱之曰南海明珠

瘿暈山房詩鈔

珥尤敦倫紀

縣志

性嗜酒無

日不持杯惟執親喪斷酒三年一勺不入口人餉以珍

異必焚香薦於寢而後敢嘗

謝蘭生撰瑞一先生逸事

會薦舉鴻博

大吏上其名

縣志

南海勞孝與同被徵約與俱珥曰子

有母八十不畏碧玉老人見哂乎

瘿暈山房文鈔

乾隆戊午舉

於鄉無計偕意母促之乃行及南返不復出

縣志

爲文

長於序記與書法皆名重一時稱二絕

粵臺徵雅錄

所著宏

簡錄辨定筆山堂類書前明登科入仕考皆散佚惟安

舟遺稿傳於世

廣東通志

呂堅字介卿番禺歲貢生性兀岸自異少所許可高談

雄辯四座皆驚家貧甚然胸次磊落無所介簞瓢屢空
笑傲自若也以同邑張大進爲師大進博極羣書文筆
與瞻堅盡受其學益都李文藻見其詩奇之由是得名
與順德張錦芳黃丹書黎簡稱嶺南四家詩文幽豔陸
離奇情鬱勃不肯作一常語顧贈磴名場老而不遇於

四家最後歿云著有遲冊集若干卷

據嶺南四家小傳嶺南羣雅集嶺海

詩鈔參修番禺縣志稿

劉彬華字藻林番禺人幼穎悟好學乾隆五十年中舉
人年甫十六同榜謝啟祚年九十四一老一少人以爲
美談嘉慶六年成進士改庶吉士散館授編修請假歸

省恨父先卒不及見以母老多病不復出先後主講端溪越華兩書院勤於課士越華向設生童正外課五十餘名彬華請於大吏增額至一百五十餘名書院掌教六年有成效者例得奏請議叙諸生欲聯呈爲彬華請彬華止之謂授徒儒生分內事毋濫邀議叙也粵中大吏皆禮重之地方事之有利於民者彬華以爲言輒聽六脈渠爲城中水道一遇淫潦不疏通則街衢淹浸而有司率奉行故事往往淤塞彬華請於大吏爲籌畫力濬之又議設卹養局以惠貞節此外會修通志修貢院諸舉皆彬華贊成之任事不辭勞亦不與人爭交久能

敬不校橫逆友愛兩弟弟歿撫從子如所生殆粹然儒者也年五十九卒遺囑不鼓樂不買水不作佛事家祭毋殺生出殯人夫毋得過百人毋刻行狀毋撰墓志毋刻詩文集卒之曰識與不識莫不歎惜之輯粵人詩名

嶺南羣雅集

番禺縣志稿

黎應南字見山號斗一廣東順德人嘉慶戊寅順天經魁以書館議叙選浙江麗水縣知縣調平陽縣知縣海疆俸滿加六品銜卒於官年四十有八其父曾爲太倉州牧因僑寓蘇州從李銳受學深得師承生平著述秘不示人亦不編輯歿後其子无咎年甫七齡更不知其

稿之散佚與否所傳者惟開方說後跋其畧曰憶自庚午之冬應南始從先生受算學由九章兼及西法甲戌之秋以開方說見授曰開方者除法也超步定位肇於少廣宋元諸家入以天元之術有天元斯有正負因有帶從諸乘方其式如階級重重迤邐遞進或以正負步或以負步正有翻積有益積皆一定之理李氏測圓海鏡秦氏數學九章均通其法誠算家絕詣也宣城梅氏著少廣拾遺立開一乘方以至開十二乘方法枝枝節節室礙難通未免舍本而逐末爰著開方說三卷上卷起例發凡臚列算式中卷正負互易平立代開得數可

定其大小命分則齊以并差下卷反覆推求有義必搜
無法弗備可謂盡開方之變矣上中兩卷早有成書惟
下卷止有條例未立設問丁丑之夏先生病且革因應
南鑽仰有曰特於易簣之際再三屬爲補成故下卷諸
數皆謹遵先生遺命依法推衍非敢參以己見并將先
生平日論開方之語識於簡末與海內明算者其深究
焉又有求句股率捷法任設奇偶兩數各自乘相併爲
弦相減爲句或爲股副以兩數相乘倍之爲股或爲句
若任設大小兩奇數或大小兩偶數各自乘則相併半
之爲弦相減半之爲句或爲股其兩數相乘卽爲股或

卽爲句所得之句股弦皆無零數

續疇人傳

又見山亦著作

才也其於經史坤輿之學無不貫通尤於天元精熟故有求句股率之捷法蓋亦由天元通分所致曾擬倣水道提綱例譌地理沿革提綱乃因簿書鞅掌不遑撰述且貧困一官身罹六極更可哀已

續疇人傳論

崔弼字積匡番禺人父國佐邑生員性至孝母喪未殯暑月匿木滲跪而舐之旣葬日夜號於墓曰兒在斯兒在斯弼少承家學年十二能詩未弱冠已成詩一卷名非今集旣壯才氣縱橫時賢傾倒中嘉慶辛酉科舉人南城曾燠爲廣東布政使司愛才下士隆下交之禮每

枉駕造其廬。彌家貧煥時。賙以粟帛。至再三不得辭。乃受。故煥贈詩有云。燕寢清香一樽酒。眼中復得謝與崔。謝謂南海謝太史蘭生也。又云。崔子商歌出金石。豪氣不爲饑寒銷。彌序懷詩亦云。雉介雞廉分所宜。蠅營狗苟欲奚爲。介然自守可知矣。彌平日遊公卿間。未嘗干以私。間以公事詢之。輒不對。其子連陞將從軍連州。入辭。彌以捐軀報國。語訓之。刺刺不休。家人厭其不祥。思掩其口不得也。連陞卒能戰死。事具連陞傳。彌日事累述。自親鉛槧。卒時年八十九。總督阮公爲題其墓曰。公人崔鼎來寶藏。著有珍帚編詩遊甯草兩粵水經注。

羅外紀等書

據玉壘山房詩話嶺海詩鈔
訪冊參修番禺縣志稿

凌揚藻字譽釗番禺人爲郡增生父驥喜酒嗜古酒病
弗能履遂舍舉業杜門養病相過從者多田夫野老及
樵悴專一之士或終日寂對不一語著有樗鳴草揚藻
幼具異稟能日誦數百言大興朱珪撫粵愛才下士揚
藻與何大源何應駒等均被溫接姚文田督學見所試
諦詒異同考擬趙充國頌異之擢置一等嘉慶十四年
秋海寇迫內河市井亡賴乘間劫掠揚藻爲畫方畧有
警則縱金發礮近者赴救遠者擒要害爲聲援由是盜
不敢犯其論學以躬行爲本以無自欺爲端以期於有

用爲歸宿所著有藥洲詩畧六卷藥洲文畧十六卷續編十二卷柱摺藏記六卷四書紀疑錄六卷春秋咫聞鈔十二卷蠡勺編四十卷嶺海詩鈔三十四卷年八十六卒子湘衡亦縣增生有詒癡子集湘芸有百尺梧桐書屋草張維屏稱其祖孫父子兄弟人皆有詩詩皆有集粵東百年來未多覩也

據吳應達撰墓志劉達成撰
攄鳴生傳藥洲事畧聽松廬

參修番禺縣志稿

李士楨字廣成番禺人世所稱李東田者也少負異才與順德黎簡遊簡以爲畏友擅詩尤工駢體文吳慈鶴以力掃門面獨闢蠶叢八字詡之家貧持硯餬口四

惠潮嘉道胡克家延之幕府嘉慶元年巡撫朱珪以進
大禮慶成詩蒙

上賜賚進兵部尚書督兩廣士楨爲克家作賀制府賤
制府異之後知爲士楨筆特召入節署賜食因命擬元
年

恩詔謝表又親題士楨所著青梅巢詩稿

詩云嶺海三年擇桂菅愛

占光氣燭雲鬟今朝快讀士楨由是益知名士楨時尙

警人句招取之衆柏馬間

未應童子試制府輒令赴縣考士楨引嫌補試一場卽

返潮州制府馳書克家曰李生實可培之器人方爭汲
彼獨夷退止補一考今府試在卽恐復以貧瞻顧閣下

成就後學諒有同心其量資之俾速來克家遂飲五十
金遣士楨歸府試以第一名送院遂補諸生六年充辛
酉科拔貢入都未遇歸客武昌既而復歸讀書粵秀山
龍王祠作山中讀書賦感朱公之知作受知始末又作
朱文正序畧自謂三十年來開口笑之日無幾得閒則
含毫伸紙踟壁高哦殆名士之失職者也著有青梅巢
詩鈔青梅巢外集若干卷

據嶺南羣雅青梅巢詩鈔自序及外集采訪冊參修番禺縣志

梔

黃子高字叔立號石溪番禺人少以詞章擅名年二十
補縣生員益留心掌故攷證金石藏書甚富率多異本

一一手自校勘務爲樸學善書尤精小篆用筆如鑄人
得片紙爭藏弄焉道光十年督學翁心存以南海對試
諸生子高立就千餘言督學驚異謂足與揚州汪中廣
陵對並美遂以優行第一貢太學總督阮元重之拔爲
學海堂學長子高性和而行介某道盧某都統奕湘慕
其名折節造廬竟不得見惟與順德梁梅南海譚瑩胡
調德嘉應吳蘭修同邑居鏗儀克中侯康爲文字交顧
屢困鄉闈年僅四十六而卒人咸痛惜之著有石溪文
集二卷知稼軒詩鈔九卷續三十五舉一卷粵詩蒐逸
四卷生平尤重桑梓鄉邦文獻葺綴甚勤子鴻逵篆隸

有父風子高歿後鴻達亦卒所藏書今散失盡矣

據譚瑩撰

墓志知稼軒詩鈔諸跋翁校士錄宋訪冊參修番禺縣志稿

居樟華又名溥最後更名鐸字少楠番禺人聰敏好學

博涉經史尤精熟選理嘗作白菊詩百首才名噪一時

工駢體文沈博絕麗鮮與爲比文章鉅公咸賞之年四

十餘始補諸生客死韶州著述散逸所存灘江草枝溪

草皆少作云

據宋訪冊楚庭耆舊傳參修番禺縣志稿

黃培芳字子實又字香石香山人鄉賢黃佐八世孫也

父紹統由舉人選石城縣學訓導擢瓊州府學教授開

仰山堂以課士學者稱仰山先生世寓會城之泰泉舊

里培芳嘉慶九年甲子科中鄉試副榜考取武英殿校錄議叙一等選授韶州府乳源縣學教諭調補陵水教諭二十一年襄辦夷務得內閣中書銜居母憂哀毀盡禮侍從兄疾衣不解帶知府李威延主講羊石書院立學規極嚴家雖貧所交多豪俊總督祁墳藩司阿勒清阿曾煥楊振麟知州許乃來先後皆以禮相待延之課子弟秉鐸乳源時新進諸生沿舊例書券爲贄及送出門卽返諸其袖老生應考貧不得歸者留之共飯助資歸之量移陵水以海外士習樸陋書籍罕覩詳列教條備開當讀書目徧諭鄰里順湖書院膏火不敷言於有

司撥三昧寺餘田贍之自少以詩名太史馮敏昌賞其
詩集門下士曰老夫當讓此子出一頭地閣學翁方綱
目張維屏譚敬昭與培芳爲粵東三子工書畫片紙尺
幅人爭藏弄年八十有一卒著有易宗浮山小志香山
縣志肇慶府志新會縣志雲泉隨札虎坊雜識縹緲雜
錄藤陰小記兵畧嶺海樓詩鈔文鈔香石詩話

番禺縣志寓賢

傳稿

黃玉階字季升番禺人道光壬辰舉人丙申進士官刑
部主事以母老乞養南歸年四十一卒著有韻陀山房
詩文集八卷宣蘇室詞鈔一卷遊仙唱和詞一卷玉階

少溫雅早有聲庠序嘗讀鄺露赤雅作詩三十三首沈
雄頓挫綺麗纏綿爲時傳誦工駢體嘗以南城曾煥所
選駢體正宗尙多遺畧乃廣搜博采擷其精者以爲續
編又以粵東詞學頗少專家約諸詞人於學海堂創爲
詞社選題校藝排月舉行又嘗議重修城南大忠祠明
南園前後十先生舊社也惜事未果而卒時同里以詞
賦稱者沈世良字白眉博雅嗜古詩學吳梅村尤以詞
得名所著有楞華堂詞兼玉田石帚之勝爲諸生十年
亦以貧病至三十餘歲竟卒抱才不偶視玉階尤可惜
云

據楚庭耆舊集松軒筆記
采訪冊參修番禺志稿

張炳文字虎臣生百日而孤母黃苦節事具列女傳炳
文事節母以孝聞初補商籍生員改歸番禺中嘉慶六
年辛酉科舉人戀母不赴禮部試母年七十餘病篤炳
文禱於神辭旨痛惻母疾頓瘳壽至八十五母卒炳文
哀毀骨立丁丑始赴都大挑二等補四會訓導子維屏
登第作令湖北炳文作書累數千言勸之然未嘗就養
曰吾欲近守墳墓也喜吟咏詩抒寫性情不事雕琢著
有玉燕堂詩鈔二卷卒年七十有四維屏別有傳

據息
耕草

堂文集修本堂稿嶺南羣
雅集采訪冊參修縣志

胡燕方字翼南同治甲子科副貢少孤母撫之跬步不

離母既長娶妻猶寢母室中母不許則夜中頻起視母
寢安否侍母食憂母食少走市中買資盥新美者盛飯
以進母感其意爲加一餐則大喜母病啜粥不飯亦啜
粥不飯刲股和藥母病竟愈家貧授徒於外得束脩以
養而母復病遂辭歸侍湯藥晝夜憂勞得咯血疾禱於
神求死以代母迎醫跪泣不起醫者感動授以藥方而
告人曰病不可治吾重違孝子意耳母卒哀毀藉草卧
於地吐血於草而不自知也未幾亦卒年三十八

據采訪冊

陳豐撰傳
修縣志

溫承恭字靖聞號莊亭德慶人嘉慶十三年歲貢

端人集

性倜儻有大志慕陳同甫爲人九齡能讀崔鴻十六國

春秋年十五遂通諸史

肇慶府志

能詩尤喜爲駢體文學使

李調元奇之

陳在謙溫莊亭傳

嘉慶初川楚用兵慨然有從軍

志姊壻爲華陽令遂入蜀中途兩遇盜皆以智免

彭泰來撰

溫莊亭先生墓表

至華陽時方奉檄買補沈失軍米齎大營計

無可任者承恭請往經夔州聞賊將薄城急謁夔守周

景福曰孤城無援非固守不可宜截收所齎糧爲持守

計周從之遂中道交割而還夔藉以安

府志

初過武昌遇

漢陽人張瑤習知兵自言可將十萬

墓表

握手吐衷曲同

三鸚鵡洲爲文祭禰衡墓相與大哭

傳

久之客松潘地

爲古氏羌與吐蕃雜處懸鎮外乃歷窮籌廢砦訪古碑

碣考前代兵食之制者松潘防守議又爲松潘志三卷

墓表還粵後家益貧常敝衣蔬食門外乞貸猶竭蹶應之

生平當裘馬濟楚笙歌雜遛輒嗒然終日至於論事變

得失古今成敗縱橫上下一座盡傾卒年五十有八著

有補迂集六卷雜論偶記一卷莊亭詩文集二卷子颺

傳字仲道號陶舟嘉慶戊寅科舉人李光廷古本大學跋於學至

精篤雖疾病未嘗釋卷尤嗜研經出入漢宋平心以求

其安至列史百家之言皆務旁羅貫通探賾舉要彭泰來撰

墓碣再上春官卒於京師古本大學跋年四十著易繫辭解一

卷古本大學解一卷書序辨一卷秦楚之際月表辨一

卷善宜堂集六卷

墓碣

跋玉烟堂章草諸刻

草法本出於篆史游章草急就章草書之權輿也自漢張伯英崔子玉魏鍾元常吳皇伯休晉衛夫人王右軍索征西皆摹之而皆不得傳本唐顏師古作注宋王伯厚刻玉海國朝孫淵如刻攷異尙據有碑本惜其不摹刻章草而以真書易之也孫所據碑本云紹聖三年勒石稱皇伯休書得一千三百九十九字云與玉海碑本異同皆合今亦不得見此玉烟堂本得一千三百九十五字除第一二等目實一千二百七十一字雖殘缺數字然當從紹聖刻本摹出王虛舟謂其筆意與官帖

皇伯休文武帖同而孫又謂紹聖本爲索征西書卽張郡公所稱黃長睿摹本余按皇索書均不必論而要出自古本章草脈紹於是乎在矣爰取而存之漢帝千文王侍書久爲世詬病然必集成之字其章草古法猶未失也張伯英府君帖閣帖之上乘此刻亦得筆意并附爲章草法則焉

跋蕭子雲書出師頌

索征西出師頌或云蕭子雲筆此刻與鼎帖所刻索征西頌實同一帖惟彼挺健此稍渾厚此題爲蕭子雲者從藝苑卮言之說耳然章草流傳無多此固足珍也

書鼎帖索征西出師頌後

董華亭謂鍾太傅止傳宣示表渡江後真跡遂絕甯知
今世有索靖出師頌耶張青父謂其上有宣和印識與
書譜合故文壽承定爲真跡也

書鼎帖索征西書月儀帖後

索征西月儀始刻於秘閣續帖山林集謂恐唐人爲之
王虛舟則謂是六朝人書無唐人方幅習氣余謂此等
意格終非晉人不能也

又

前明鬱岡齋帖亦刻此月儀明潤可喜然終遜此挺拔

之致鼎帖究是宋刻可寶耳

跋玉烟堂本十七帖

王虛舟極重十七帖謂閣帖所刻右軍不及也楊大瓢則極詆之謂其遠遜閣帖平心論之閣帖所刻蒼深警健十七帖則虛和閒適品格當在閣帖上同一右軍書而刻之之異如此虛和閒適似尤得其真耳余得此本風度猶存亦近所不易得者矣

又

十七帖前明餘清齋鬱岡齋二帖皆刻之玉烟堂則從來禽帖摹出故邢子愿跋亦並刻於後然此本告姜帖

亦竄其中恐非玉烟本然實勝玉烟也

跋智師草書千文

智師真草千文本夾寫此刻分爲兩本然頗得渾厚之意惟其中有摹刻舛誤之字則各本已然以筆致論則此本猶是佳刻也

玉烟堂董帖題後

唐自虞褚後得晉人法者宋則米南宮元則趙承旨明代則不得不推董宗伯矣蓋晉法運魄力於隼永中有勢有韻宗伯生千載後研精覃思乃能得其意其所臨各種皆有神氣而玉烟之刻較清渾蜀青華蜀諸本尤

爲香光之勝也嗜古者能弗辨諸

又

董文敏書法高秀力追右軍筆筆有骨而妍媚自足世之摹手能得其形似而不得其神細觀此帖當不爲贋書所惑耳

題趙芬殘碑

有翁覃溪跋

此趙芬碑書法安雅沈鍊實與龍藏等耳翁覃溪以研尋百氏研字訛作斫遂謂是胥吏書不得比龍藏不知北朝書多謬誤隋代猶未盡洗其陋且研之與斫差在毫末或刻者偶誤不得遽以爲胥吏書也卽如龍藏碑

何人作河人五臺作吾臺誰懷作誰壞不猶之失耶何
竟軒輊也

跋孫率府書譜

此安麓村石刻書譜陳香泉爲書釋文之本也書譜之
刻以此爲最然近日石已漶漫求如此本殊不易得余
甲辰歲得此而無香泉釋文香石先生以釋文見賜俾
成完璧但釋文搨稍後不及正文尙遠然同一石而搨
有先後合觀之彌可証翻刻之異因別裝釋文爲一本
並藏之

又

右軍眞跡世不得而見閣帖法刻亦具形似不見其用
筆書譜則取法右軍其墨跡至國初猶存學者於此
求之則右軍去人不遠矣

跋書譜釋文

孫率府書譜流傳墨跡至國初安麓村摹以上石并
香泉釋文刻之今爲難得之本矣余得書譜於甲辰之
歲香石先生以香泉釋文俾成合璧雖釋文搨本稍後
然在今日亦不可求乃重裝與正文爲兩本而跋之如
此

同州聖教序書後

褚河南聖教序二本一爲雁塢一爲同州雁塢細瘦同州稍粗王虛舟以雁塢爲真跡同州爲翻刻而譏趙子函同州勝雁塢爲不知書之言然二本各具其勝且同是唐時石刻實不能軒輊也

又

褚河南所書伊闕佛龕記其骨韻與此刻同則知此爲河南在同州時書龍朔年間人爲刻之而非重摹雁塢本也虛舟之論恐未然矣

尺間草堂遺文卷之四終

男衍昌校字